

Dumonda Favre Accola concernent la controlla decentrala da chars annex agriculs

La controlla da chars annex agriculs cun frains pneumatics u cun frains idraulics d'in uder è fitg impurtanta per la segirezza sin via. Correspondentamain èsi raschunaivel che uschè blers chars annex agriculs sco pussaivel vegnian controllads regularmain.

Ina contribuziun per la segirezza sin via fiss, sche la controlla da quests chars annex agriculs na vegniss betg mo fatga centralmain a Cuira cun tut il bler temp ch'ella dovra, mabain er en las regiuns decentralas sco per exempel en il Landwassertal (Tavau) u en l'Engiadina (Puntraschigna).

Ins po partir dal fatg che bler dapli purs vegnissan a profitar d'ina pussaivladad decentrala da laschar controllar lur chars annex (augment da la segirezza sin via), perquai ch'els na stuessan betg impunder in di per char annex per ir a Cuira, per al laschar controllar e per returnar a chasa. Er la contribuziun ecologica na sto betg vegnir sutstimada, sch'i vegniss spargnà als purs da las regiuns perifericas da far quel lung viadi cun lur vehichels agriculs.

A Tavau fissi da princip pussaivel da controllar ils vehichels en il post da prova VBD da la vischnanca da Tavau (controlla dals frains da vehichels a motor grevs u da lur chars annex). Ma quai n'è betg permess, perquai ch'ils mecanists da camiuns da la vischnanca da Tavau n'han betg absolvi ils curs da la AM Suisse. Ina controlla dals chars annex en in post da prova da la Controlla da vehichels a motor tras experts che n'han er betg absolvi in curs da la AM Suisse, è percenter admissa.

1. Pertge na vegnan betg acceptadas differentas pretensiuns da curs resp. equivalents da curs sco il curs da frains WABCO da l'Uffizi per il traffic sin via? Relevant è gea mo ch'els frains vegnian controllads d'experts scolads regularmain.
2. È la Regenza er da l'avis che soluziuns pragmaticas che mainan ad in augment da la segirezza sin via, èn raschunaivlas e salidaivlas?
3. Tge ulteriuras mesiras pragmaticas prevesa la Regenza per pussibilitar controllas decentralas da chars annex agriculs cun l'intent da cuntanscher uschia in augment da l'attractivladad da las controllas e d'augmentar tras quai la segirezza sin via?

Cuira, ils 27 d'avust 2021

Favre Accola, Lamprecht, Stocker, Brandenburger, Buchli-Mannhart, Cantieni, Clalüna, Cramer, Della Cà, Deplazes (Rabius), Derungs, Dürler, Engler, Felix, Flütsch, Föhn, Gort, Grass, Hartmann-Conrad, Hefti, Hug, Kohler, Michael (Donat), Müller (Susch), Salis, Schutz, Schwärzel, Tanner, Thomann-Frank, Tomaschett (Breil), Ulber, Valär, von Ballmoos, Adank-Arioli, Bürgi-Büchel, Costa, Gujan-Dönier